

Во Вторник 3-я седмицы вечера.

На Господи воззвах, поставим стихов 6.

И поем подобны трипеснца 3, и Минеи 3.

Подобен господина Иосифа. Глас 3:

Подобен: Поставиша тридесять сребреник:

Господи, Крестом убивый льстиваго, * от прелести его избави мя согрешающаго, и прельщаема: * и постом очистив мя, даждь ми Твоя хотения совершити, * яко да вижду Владыко, радуяся, * честныя страсти Твоя.

Подобен: Поставиша тридесять сребреник:

Уязвихся сладости оружием, Господи, * и люте весь умертвихся, * исцели, и оживи смиренную мою душу, * копием прободыйся Владыко: * и уязвена стрелою врага, * яко Щедр исцели, * и честных Твоих страстей причастника мя покажи.

Ина стихира господина Феодора, глас 2.

Подобен: Да распнется:

Пощением Господи, * души просветивше, * да сподобимся неосужденно Крест Твой видети в радости, * и поклонитися страхом и любовию: * просвещает бо той страсти Твоя вольныя, * яже благоволи достигнути нам, * яко Человеколюбец.

И в Минеи 3. Слава, и ныне, Богородичен.

Прокимен, псалом 47, глас 3: Велий Господь, и хвален зело, во граде Бога нашего.

Стих: Во граде Господа сил, во граде Бога нашего.

Бытия чтение. [Глава 7, ст. 1 – 5.]

Рече Господь Бог к Ною: вниди ты и весь дом твой в ковчег, яко тя видех праведна предо Мною в роде сем. От скотов же чистых введи к себе семь семь, мужеский пол и женский: от скотов же нечистых два два, мужеский пол и женский. И от птиц небесных чистых семь семь, мужеский пол и женский, и от всех птиц нечистых две две, мужеский пол и женский, препитати семя по всей земли. Еще бо дней семь, Аз наведу дождь на землю четыредесять дней и четыредесять ночей: и потреблю всякое востание, еже сотворих, от лица всея земли. И сотвори Ное вся елика заповеда ему Господь Бог.

Прокимен, псалом 48, глас 2: Уста моя возглаголют премудрость, и поучение сердца моего разум.

Стих: Услышите сия вси языцы.

Притчей чтение. [Глава 8, ст. 32 – 36. Глава 9, ст. 1 – 11.]

Сыне, послушай мене: и блажени, иже пути моя сохранят. Услышите премудрость, и умудритесь, и не отмените. Блажен муж, иже послушает мене, и человек, иже пути моя сохранит, бдяй при моих дверех присно, соблюдаяй праги моих входов: Исходи бо мои, исходи живота, и уготовляется хотение от Господа. Согрешающии же в мя, нечествуют на своя души: и ненавидящии мя, любят смерть. Премурость созда себе дом, и утверди столпов седмь: закла своя жертвенная, и раствори в чаши своей вино, и уготова свою трапезу. Посла своя

рабы, созывающи с высоким проповеданием на чашу, глаголющи: Иже есть безумен, да уклонится ко мне: И требующим ума, рече приидите, ядите мой хлеб, и пейте вино, еже растворих вам. Оставьте безумие, и живи будете: да во веки воцаритесь: и възшците разума да поживете, и исправите разум в ведении. Наказуяй злыя, примет себе безчестие: обличаяй же нечестиваго, порочна сотворит себе: [обличения бо нечестивому раны ему]. Не обличай злых, да не возненавидят тебе: обличай премудра, и возлюбит тя. Дажь премудрому вину, и премудрейший будет: сказуй праведному, и приложит приимати. Начало премудрости страх Господень, и совет святых разум: разумети бо закон, помысла есть благаго. Сим бо образом многое поживеши время, и приложатся тебе лета живота твоего.

На стиховне самогласен дне, дважды. Глас 2:

Отца Тя Создателя написати дерзаю Господи, * животное сый земнородное, * Твоего причащаяся образа, * аще и сыновства погреших, блудно пожив, * и забвением Твоих даров иждив богатство. * Да не убо отречеши мя, Твоему благоволивый Сыну единородному, * Крест мене ради плотию и смерть претерпети: * но ублажив присвой к Себе Человеколюбче.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Отца Тя Создателя написати дерзаю Господи, * животное сый земнородное, * Твоего причащаяся образа, * аще и сыновства погреших, блудно пожив, * и забвением Твоих даров иждив богатство. * Да не убо отречеши мя, Твоему благоволивый Сыну единородному, * Крест мене ради плотию и смерть претерпети: * но ублажив присвой к Себе Человеколюбче.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Лицы мученик противишася мучителем, глаголюще: * мы воинствуем Царю сил: * аще и огню и мукам предасте нас, * не отмаемся Троицеския силы.

Слава, и ныне, Крестобогородичен, глас тойже.

Подобен: Егда от Древа:

Егда Тя беззаконнии людие, * Спасе, живота всех на Древе обесиша, * тогда и Всечистая Агница и Мати Твоя, * предстоящи рыдаше плачущи: * Чадо Мое сладчайшее, свете Моею очию, * увы Мне, како посреде злодеев к Древу пригвоздился претерпел еси, * землю повесивый на водах?

В СРЕДУ 3-Я СЕДМИЦЫ НА УТРЕНИ ТРОИЧНЫ.

По 1-м стихословии седалны Крестныя Осмогласника.

По 2-м же стихословии глаголем настоящий седален
господина Иосифа, глас 3.

Подобен: Красоте девства:

Древом увядил еси пламень Владыко * преступления на Крест возвышаемь, * и умертвил еси врага, умертвився волею. * Темже Тя молю, плоти моя хотения умертви, * и оживи окаянное сердце мое, * постом страстоубийственным, * очистив мя от всякия скверны, * яко Благоутробен.

Слава, тойже.

И ныне, Крестобогородичен. Подобен:

Поносную Щедре смерть, * распятием, волею претерпел еси: * Егоже Рождшая Тя Христе, * зрящи узвляшися, утробою терзашися, * матерски рыдаше. * Еяже молитвами, за милосердие милости Твоя ущедри, * и спаси мир, вземляй сего грех.

По 3-м стихословии седален, глас 2.

Подобен: Воскрес от гроба:

Светлую преходяще постную трапезу, вопиим: * вся соблюди Господи в мире, * всякаго коварства вражия избавляя, * и сподоби нас яко Преблагий, * Крест Твой честный любовию лобызати, * имже милости Твоя подая вселенней, * едине Многомилостиве.

Слава, тойже.

И ныне, Крестобогородичен, глас тойже.

Подобен: Милосердия:

Дева и Мати Твоя Христе, * на Древе зрящи Тя мертва простерта, * плачуши горько, вопиющи глаголаше: * что страшное сие таинство? * Всем даруйай жизнь вечную, * волею на Кресте како умираеши смертию поною?

Канон в Минеи, и настоящий трипеснец господина Иосифа.

И стихословится песнь. Глас 3.

Песнь 3.

Ирмос: Утверждение ...

Сраспинаема нас ради распеншемуся, умертвим вся плотския уды в постех, и молитвах, и молениих.

Терние греха искоренивый Крестом Твоим Господи, терновная помышления ума моего исторгни.

Вооруживше мысли постом, побеждаим чуждия полки бесовския, силою Креста ограждаеми.

Богородичен: Воплощаемое из Тебе пройде Слово, падение Пречистая праотец, за милосердие щедрот, исправляя.

Иный господина Феодора, глас 2.

Ирмос: Утверди нас в Тебе Господи, * Древом умершвей грех, * и страх Твой всади в сердца * нас поющих Тя.

Твой животворный Крест Господи, печать мне есть во спасение: тем бо сопротивоборца упражняя, воспеваю Тя яко Бога Всесильнаго.

Древо Крестное плод принесе миру, оживления присносущнаго: егоже мы вкушающе, от смерти Христе избавляемся.

Троицен: Три одинаго зрака Лица славлю, Отца, Сына, и Духа едину державу Божества: царствующи бо и единоначальствует яко Бог.

И ныне, **Богородичен:** Рождество Твое Чистая, страшно есть: Бог бо есть вочеловечивыйся, безлетно от Отца рождейся, и из Тебе в последняя без мужа родився.

Слава Тебе Боже наш, слава Тебе.

Благодать Креста предпросиявши миру к Божественным Твоим страстем Щедре, призывает вся ны: имже верно поклонитися сподоби.

Катавасия: Утверди нас в Тебе Господи, * Древом умершвей грех, * и страх Твой всади в сердца * нас поющих Тя.

Песнь 8.

Ирмос: Нестерпимому огню ...,

Крестом начала победивый, и власти темныя, Светодавче, егда приидеши со властию судити миру всему, да не моя Слове объявиши тайная, да многое Твое прославляю благоутробие.

Судимь Судия пред судищем стал еси, осуждая вражду Крестом Твоим, долготерпеливе правосуде. Темже осуждения вечнаго избави, страхом зовущия и превозносящия Твое человеколюбие.

Поста огнем обострившеся дети благочестивии, возвышенный древле пламень, Божественною рососою угасиша воистинну. И мы постящеся, печи всех страстей угасим, яко да геенскаго избегнем пламене.

Богородичен: Из Тебе Божия мудрость храм Себе создавши, воплотися неизреченным снизхождением, Отроковице неискусобрачная: Ты бо едина от всех родов избрана еси нетленная, нетленнаго в жилище Слова.

Иный.

Ирмос: В купине Моисею Девы чудо, * на Синайстей горе, прообразившаго иногда, * пойте, благословите * и превозносите во вся веки.

Носяй вся словом, мене ради вся терпиши, заушения, и оплевания, и распятие Христе: хвалю величия Твоего человеколюбия во вся веки.

Закалаешися Христе яко Агнец, прободен в ребра Твоя, да мя овча заблуждшее спасеши от сети диаволи, и добрей Твоей ограде причтеши во веки.

Благословим Отца, и Сына, и Святаго Духа, Господа.

Троицен: Божество едино Троице, нераздельное Естество, раздельно же Лицы, присносущная державо, Отче, Сыне, и Душе Святый, Тя песнословим во вся веки.

Богородичен: Богородительнице Чистая, небесная дверь, спасительная врата, всех христиан мольбу прими, Тебе блажащих во вся веки.

Слава Тебе Боже наш, слава Тебе.

О Кресте Твоем Христе, священницы хвалятся, иноки укрепляются, всякий просвещается верный: сподоби мя сего видети, и поклониться, и пети во веки.

Хвалим, благословим, покланяемся Господеви, поюще и превозносяще во вся веки.

Хвалим, благословим, покланяемся Господеви, поюще и превозносяще во вся веки.

Катавасия: В купине Моисею Девы чудо, * на Синайстей горе, прообразившаго иногда, * пойте, благословите * и превозносите во вся веки.

Песнь 9.

Ирмос: В законе сени ...,

Змия Моисей на древо вознес, образоваше Тя Иисусе на Кресте волею вознесена, и лукаваго ядовитую злобу изгнавшаго, к Себе же человеки привлекая, Человеколюбче.

Огнем мя Твоего страха очисти, возжигая в моей души Божественную Твою любовь, и Крестом Твоим огради мя, еже прельсти ветхий зачинатель, сладкими омрачив мое Христе помышление.

Скверных помышлений, и деяний злых, постимся братие, очистим сердца, вперимся божественными добродетельми, и долеревностныя злобы стремлений уклонимся, да Пасху великую светоноснии узрим.

Богородичен: Из Тебе в нашу нищету Дево, хотя облечеша, Богатый естеством, видимъ же нам бысть Невидимый вышними лики певаемый, сокрушенный образ обновляя благостынею.

Иный.

Ирмос: Тебе мысленную и одушевленную левствицу, * на нейже Бог наш утвердися, * еюже к небеси обретохом восхождение, * песнями Богородице величаем.

Тебе на Кресте руке распростерша и четвероконечная присвоивша, Имже ко Отцу обретохом вход, Сыне Божий, вси величаем.

Тебе тернием Христе венчавше, беззаконнии бияху, и распяша, Егоже ради поднебесная колебашася вся: мы же спасеша Тя величаем.

Троицен: Тя трисветлое Святое Божество, все содержащее, и хранящее присно, Отца, Сына же, и Духа Живаго, песнями немолчными величаем.

Богородичен: Тя светлый облак Духа, из негоже нам возсия свет неприступный, Христос, правды великое Солнце, песнями Богородице величаем.

Слава Тебе Боже наш, слава Тебе.

Ты нам свет, святое сложение, одоление победы, Христов Кресте, ты нам воздержание услади, и тебе поклониться сподоби.

Катавасия: Тебе мысленную и одушевленную левствицу, * на нейже Бог наш утвердися, * еюже к небеси обретохом восхождение, * песньми Богородице величаем.

Светилен гласа.

На стиховне самогласен дне, дважды, глас 2:

В чести сый сыновства, * Отца благаго несмысленный аз не разумех: * но себе славы лиших, * богатство зле иждив благодати. * Недостаточествуемъ же Божественныя пищи, * ласкатель бых скверному гражданину, * от негоже послан бых в душетленное его село, * живый блудно, пасомъ бых со скоты, * и сластем работая не насыщахся: * но обращаю вопию благоутробному и щедрому Отцу: * на небо и пред Тобою согреших, помилуй мя.

Стих: Исполнихомся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

В чести сый сыновства, * Отца благаго несмысленный аз не разумех: * но себе славы лиших, * богатство зле иждив благодати. * Недостаточествуемъ же Божественныя пищи, * ласкатель бых скверному гражданину, * от негоже послан бых в душетленное его село, * живый блудно, пасомъ бых со скоты, * и сластем работая не насыщахся: * но обращаю вопию благоутробному и щедрому Отцу: * на небо и пред Тобою согреших, помилуй мя.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Святых Твоих множества * молят Тя Христе, * помилуй ны, яко Человеколюбец.

Слава, и ныне, Крестобогородичен:

Подобен: Егда от Древа:

Болезни претерпевшая многия в распятии Сына и Бога Твоего Пречистая, * въздыхала еси слезящи, * и вопияла еси горько: * увы Мне Чадо сладчайшее! * Неправедно како страждеш, * хотяй избавити сущия от Адама земнородныя? * Тем Всесвятая Дево, Тя молим верою, * милостива нам Сего сотвори.

НА 6-М ЧАСЕ

Тропарь Пророчества. Глас 8:

Состава дел в нас несть Господи: * милостив еси Человеколюбче, * дел рук Твоих не презри Безгрешне.

Прокимен, псалом 49. Глас 4: Пожри Богови жертву хвалы, и воздаждь Вышнему молитвы твоя.

Стих: Бог богов Господь глагола, и призва землю:

Пророчества Исаина чтение. [Глава 10, ст. 12 – 20.]

Будет, егда скончат Господь вся творя в горе Сиони, во Иерусалиме, наведет на ум великий, на князя Ассирийска, и на высоту славы очию его. Рече бо: крепостию руки моя сотворю, и премудростию разума [моего] отыму пределы языков, и силу их пленю: И сотрясу грады населенныя, и вселенную всю обыму рукою моею яко гнездо, и яко оставленная яйца возму, и несть, иже убежит мене, или противу мне речет, и отверзет уста, и глумит. Еда прославится секира без секущаго ею? или вознесется пила без влекущаго ю? такожде аще кто возмет жезл, или древо: и не тако. Но послет Господь Саваоф на твою честь безчестие, и на твою славу огонь горя возгорится. И будет свет Израилев во огонь, и освятит его огнем горящим, и пояст яко сено вещество. В той день угаснут горы и холми, и дубравы, и пояст от души даже до плотей: и будет бежай, яко бежай от пламене горяща. И оставльшиися от них будут в число, и отроча малое напишет я. И будет в той день, не приложится к тому останок Израилев, и спасеннии Иаковли не будут ктому уповающе на обидевшия их: но будут уповающе на Бога Святаго Израилева истинною.

Прокимен, псалом 50, глас 6: Помилуй мя Боже, по велицей милости Твоей.

Стих: Сердце чисто созижди во мне Боже.